

DOMENIE XXVI «VIE PAL AN»

Jutoris pe Liturgjie

Domenie, ai 29 di Setembar dal 2019

Tai agns sessante - setante dal secul passât si podeve lei ancjemò la parabule dal “om siôr e dal puar Lazar” come un fat reâl che al è sucedût e al continuerà a sucedi propit cussì. E jere la cronache dal judizi just e tremant di Diu e de eternitât dal infier.

I studiôs di vuê a àn bandonade cheste strade e a ponin la conte di Gjesù te sô juste dimension, fra lis pussibilis rispuestis a lis grandis domandis sul ben e sul mâl, su la injustizie dal mont, sul destin de storie sot il voli di Diu pal credent, tune no-soluzion se dut finîs culi.

La reson no rive a dâ rispueste al eterni probleme dal mâl ancje parcè che di secul in secul ogni rispueste e cole; e reste cheste peraule di Gjesù che nus sigure suntun judizi di Diu te tragedie dal pecjât dal om; chest e vonde; di fat la parabule e je segnâl che al dîs e nol dîs; no podìn pretindi di plui.

Cheste conte e aparten a lis tantis riflessions sparniçadis te Bibie e unide a chês, nus palese une veretât che ducj o capin: il siorat che al ingrume dome par se al è condanât, intant che la persone di cûr e ven salvade. Di chi la esortazion dal Signôr di domenie passade: Fasêtsi amîs cu la ricjece ingrumade malamentri, par che, cuant che us vignarà a mancjâ, us acetin tes tendis eternis.

Al reste però il fat: il miôr coment al vanzeli di vuê o podìn cjatâlu dome te comunitât che e da vôs a chel che vôs nol à, te comunitât li che il tribulât al pues dîti a ti: spiete il Signôr, / parcè che cul Signôr si cjate il boncûr (Sal 129, 7). E je la vôs dai tribulâts il miôr coment e dome condividint cun lôr o rivarìn a la sapience de parabule.

Antifone di jentrade

Dn 3,31.29.30.43.42

Signôr, dut ce che tu nus âs mandât tu lu âs fat seont une sentence vere;
o vin pecjât cuintri di te, no vin ubidît ai tiei comandaments;
ma cumò dai glorie al to non e tratinus seont la ricjece dal to boncûr.

Colete

Diu, che tu palesis la tô plui grande fuarce
cuant che tu perdonis e tu âs dûl,
fâs risinâ cence polse sore di nô la tô gracie,
par ch’o corin viers di ce che tu âs imprometût
e o spartin cun te l’ereditât dal cîl.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Am 6,1.4-7

Vualtris che o vivês une vite slavrade o larês in esili.

Al jere sutun gjornâl di chê altre di la fotografie di un water dut di aur 18 carats opare di valôr te societât di vuê. Chei che a levin a viodilu a podevin prenotâ tre minûts di timp par doprâlu.

Cheste notizie al è il miôr coment a la leture di vuê e ancje la condane di chei che no si scomponin se Josef, se la nestre societât e va in sfas. La leture e ripuarte ancje un judizi finâl.

Dal libri dal profete Amos

Cussi al dîs il Signôr onipotent:

«Puars mai lôr chei di Sion che no bacilin

e chei che si sintin sigûrs

su la mont di Samarie!

Lôr, ch'a stan distirâts sun jets d'avori

e a son covâts su lis lôr poltronis,

ch'a mangjin i agnei dal trop

e i vidiei de stale.

Lôr, ch'a bacanin compagnâts dal sun da l'arpe:

come David, s'inventin struments di cjant.

Lôr, ch'a bevin tes anforis dal vin

e si onzin cul onzint plui fin,

e no si scomponin se Josef al va in sfas.

Pa la cuâl a saran menâts vie

in teste dai depuartâts,

e e fïissarà la barachele dai poltrons».

Peraule di Diu.

SALM RESPONSORIÂL

dal Salm 145

Il salm al è tant biel che mai e a leilu stant sentâts sul sofà al console. Al è che, cjalant al mont tal concret, al aparten plui al ordin de sperance che a chel de realtât. Chê sperance che no bandone mai l'umanitât e che i da a la persone di fede spirt e corajo tal scombati pal avent dal ream di Diu in primis in chest mont.

A son peraulis, ancje il ritornel, di proferî pensant a ce che si dîs; se no, cence riflession e umiltât a puedin diventâ une banâl brons che al sune e tamburel che al sglinghine (cf. 1 Cor 13, 1).

Furtunâts i puars tal spirt.

Se cjantât: Il cjant dai salms responsoriâi, p.

Il Signôr al fâs justizie ai tibiâts,

ur da il pan a di chei ch'a son afamâts.

Il Signôr i presonîrs al libere. **R.**

I vôi dai vuarps il Signôr al torne a vierzi,

il Signôr al torne a tirâ sù chei ch'a son par tiere,

il Signôr i vûl ben a la int juste. **R.**

Il Signôr al vuarde la int foreste,

al viôt dal vuarfin e de vedue,

impen che lis trainis dai triscj lis savolte.

Il Signôr al regnarà par simpri:

il to Diu, Sion, di ete in ete. **R.**

SECONDE LETURE

1 Tm 6,11-16

Ten cont dal comandament cence colpe, fint a la manifestazion dal Signôr.

Si pues presentâ chest trat di letare di Pauli come esortazion a dutis chês personis, oms e feminis che a àn a cûr lis nestrîs comunitâts di paîs simpri plui cence predi: justizie, religjon, fede, amôr, pazience, biel trat... "umanitât" a son lis virtûts da l'anime che a vegnin, cu la gracie dal Signôr, prime di ogni organizazion.

De prime letare di san Pauli apuestul a Timoteo

Benedet, tu, om di Diu, sta lontan di chestis robis; cor daûr invezit a la justizie, a la religion, a la fede, al amôr, a la pazience, al biel trat. Combat la buine batae de fede, cîr di cuistâ la vite eterne, che tu sês stât clamât e che par jê tu âs fate la tô biele profession di fede denant di tancj testimonis. Ti sconzuri denant di Diu ch'al fâs vivi dutis lis robis, e denant di Gjesù Crist ch'al à fate la sô biele testimoniance sot di Ponzi Pilât, di tignî cont dal comandament cence magle e cence colpe, fint a la manifestazion dal Signôr nestri Gjesù Crist, che le fasarà, tal timp destinât, il beât e unic sovran, il re dai rês e il paron dai parons, l'unic ch'al à la immortalitât e al vîf tune lûs che no si pò lâi dongje, che nissun om nol à mai viodût ni mai nol podarà viodi. A lui onôr e potence eterne. Amen. Peraule di Diu.

CJANT AL VANZELI

Lc 6,21

R. Aleluia, aleluia.

Furtunâts vualtris che cumò o vês fan, al dîs il Signôr, parcè che o sarês saceâts.

R. Aleluia.

VANZELI

Lc 16,19-31

Inte tô vite tu âs vude la tô part di ben e Lazar al à penât; cumò lui al è consolât e invezit tu tu sês tormentât.

La soluzion di Gjesù no ven tal fâ diventâ siôrs i puars e puars i siôrs parcè che i puars a puedin ancje diventa piês dai siors. Il segret al è la nestre conversion, puars e siôrs, al insegnament di Gjesù: ducj vualtris o ses fradis (Mt 23, 8).

In chest il vanzeli di vuê al è plui che clâr: A àn Mosè e i Profetis la peraule di Diu, il vanzeli di Gjesù: che ju scoltin!

Se no an chê di scoltâ Mosè e i Profetis e il nestri mestri Gjesù, no si lassaran convinci a cambiâ vite nancje se un al resussite dai muarts. nancje se a cognossin dutis lis visions, devozions e miracui, nancje se la tiere e ven ridusude – al è ce che al sta sucedint - a un còl di porcarie e di scovacis.

Dal vanzeli seont Luche

In chê volte, Gjesù al disè ai fariseos: «Al jere un om siôr, ch'al leve ator vistût di purpure e di fil di lin, e al faseve fiestins ogni dì a la grande. Un puar, ch'al veve non Lazar, si sentave su la sô parte a cirî la caritât, dut fodrât di plais, seneôs di svuarbâ la fan cui vanzums ch'a colavin de taule dal siôr. Parfîn i cjans a vignivin a lecâi lis plais. Al capitâ che al muri il puar e i agnui lu quartarin tal grim di Abram. Plui indenant al muri ancje il siôr e lu meterin sot. Lât a finîle tes inferis, framieç dai torments, al alçà i vôi e al viodè di lontan Abram e Lazar ch'al jere cun lui. Alore al berlà: Pari Abram, ve dûl di me e mande Lazar a tocjâ ta l'aghe la ponte dal dêt e a bagnâmi la lenghe, parcè che cheste flame mi tormente cence padin. Ma Abram i rispuindè: Fi, impensiti che inte tô vite tu âs vude la tô part di ben, cu la cuâl che Lazar al à dome penât. Cumò però lui al è consolât e invezit tu tu sês tormentât. In plui, fra nô e vualtris al è un grant abis; se cualchidun di nô al ves chê di passâ li di vualtris nol pò fâlu, e cussì nancje nissun di vualtris nol pò vignî fin chi di nô. E chel altri i disè: Alore, pari, ti prei di mandâlu in cjase di gno pari. O ai cinc fradis e o volarès che ur cridàs di no vignî ancje lôr in chest lûc di torments. Abram i rispuindè: A an Mosè e i Profetis: che ju scoltin!

Chel altri i replicà: No, pari Abram; ma se cualchidun dai muarts al larà di lôr, a gambiaran vite. I disè Abram: Se no an chê di scoltâ Mosè e i Profetis, no si lassaran convinci nancje se un al resussite dai muarts».

Peraule dal Signôr.

Su lis ufiertis

Diu di misericordie,
danus la gracie che cheste nestre ufierte ti plasi
e nus spalanchi la risultive di ogni benedizion.
Par Crist nestri Signôr.

Antifone a la comunion

cf. Sal 118,49-50

Impensiti, Signôr, de peraule che tu i âs dade al to famei,
tu mi âs dât parie ancje la sperance;
chest mi à dât confuart te mê miserie.

Daspò de comunion

Il misteri dal cîl che nus ristori, Signôr,
te anime e tal cuarp, par spartî inte glorie l'ereditàt
di chel ch'ò partecipin a la sô passion e o proclamìn la sô muart.
Lui ch'al vîf e al regne tai secui dai secui.

Cjants

Libri **Hosanna**, sot il titul **Eucaristie**: messe, benedizion eucaristiche, rîts e cjants; dal n.7 al n.62
comprendût.

* * *

***Cuant Crist isal diventât la nestre sperance? Ve, lu vês sintût: lui al è stât tentât, al à patût
e al è risussitàt: cussì al è diventât la nestre sperance.***

***In lui tu pues cjatâ la tô fadie e la tô ricompense: la tô fadie te passion, la tô ricompense te
resurezion... Cu lis sôs fadiis, cu lis sôs tentazions, Crist ti à mostrade la vite che tu âs di fâ
cumò; cu la sô resurezion ti à mostrade la vite che ti spiète.***

S. Ustin

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal
popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitàt todescje voltâts par furlan, ed. Glesie Furlane, 2016.*

* *Par domandâ chescj libris scrîvêt a info@glesiefurlane.org*